

et ideo major repugnantia ex hac parte est in hoc, quod Angelus habeat species innatas, et proportionatas naturae suae, quae omnes res possibles repraesentent, quam fuerit in scientia per se infusa animae Christi, quae altioris ordinis fuit, ut ibi dixi.

CAPUT XIV.

UTRUM ANGELORUM SPECIES UNIVERSALES SINT,
VEL PARTICULARES.

1. *Quæstionis sensus.* — *Prima opinio.* — Sensus hujus quæstionis ex superioribus notus est, non enim vocamus speciem universalem, eo quod solam naturam universalem sine singularibus repræsentet: nam hoc modo dictum jam est, habere Angelos species rerum singularium, quæ naturas etiam universales non abstractas, sed prout in singularibus sunt, repræsentant. Speciem ergo universalem appellamus ex parte rerum repræsentatarum, si plures et distinctæ illæ sint: particulares autem dicentur species, quæ singulas tantum res repræsentant. In hoc ergo sensu est prima opinio dicens, omnes Angelorum species esse particulares, id est, per unam speciem, unam tantum rem repræsentari, ac subinde tot in Angelo multiplicari species, quot res ab illo per species cegnosuntur, vel cognosci possunt. Ita sentiunt de speciebus rerum singularium omnes, qui docent, non esse infusas Angelis, sed a rebus desumi, Scotus, in 2, d. q. 10, Bassolus, q. 3, Major, quæst. 6, Richardus, art. 7, q. 2, et quia isti doctores distinguunt in Angelis species repræsentantes naturas universales ab speciebus singularium, ideo cum proportione de illis dicunt, unam speciem intelligibilem unam tantum specificam naturam repræsentare, et sic de ceteris.

2. *Eius fundamentum.* — Fundamentum præcipuum quoad individua esse videtur, quia Angelus sumit species singularium a rebus, ergo non potest una esse plurimum rerum, quia non potest una, et eadem species a pluribus rebus accipi, tum quia actiones talium specierum inter se differunt, tum etiam quia prima res singularis sui tantum speciem efficit, altera vero, quæ deinde succedit, non potest augere, vel quasi extendere præcedentem speciem, non est enim intelligibilis talis extensio, ergo efficit etiam suam propriam speciem, et sic de ceteris. Secundo tam de speciebus acquisitis, quam de infusis sive individuorum, sive naturalium argumentantur, quia species est res

indivisibilis repræsentans rem, cuius est species, sed non potest eadem forma indivisibilis esse similitudo plurium rerum dissimilium, ergo nec potest una species esse plurimum rerum. Probatur consequentia, quia repræsentatio speciei est per assimilationem, et si tantum sit plurimum rerum, ut inter se similes sunt, non erit principium cognoscendi illas, ut distinctæ sunt; ergo oportet, ut repræsentet eas, quatenus distinctæ, et aliquo modo dissimiles sunt, quod videtur impossibile. Tertio quia sicut habitus speciem sumit ab objecto, ita etiam species, est enim quidam habitus dicens transcendentalem habitudinem ad rem, quam repræsentat, ergo una species unum debet habere adæquatum objectum, ergo unam rem tantum repræsentare potest. Probatur hæc consequentia, quia si repræsentat plures res, neutra earum erit adæquatum objectum, neque ambæ simul esse possunt, nisi sub aliqua ratione communi, et consequenter species non repræsentabit res illas secundum propria, sed tantum secundum illam rationem communem, et ita non erit species plurium particularium, prout talia sunt. Quod si dicatur, rationem communem esse adæquatum objectum, non ut præcisam, sed ut plura sub se continentem, ad quæ repræsentanda etiam secundum propria species extenditur. Contra hoc obstat, quia sequitur, per talem speciem repræsentari infinita, vel individua, si ratio illa communis specifica sit, vel si sit generica, repræsentabit infinitas essentias specificas, quæ sub eodem genere multiplicari possunt: hoc autem excedit limitationem formæ finitæ, quia talis species habebit infinitam perfectionem: nam quo species repræsentat plures res, vel naturas, eo est perfectior, et sic ascendendo in numero rerum repræsentatarum, perfectio speciei semper crescat, ergo si infinita repræsentet, infinitæ perfectionis erit.

3. *Prima conclusio.* — *Probatur.* — Dicendum nihilominus est primo, non repugnare unam speciem intelligibilem repræsentare plures res singulares vel numero tantum, vel etiam specie differentes. Hanc assertionem supponit D. Thomas, 1. p., q. 55, art. 3, et est communior theologorum opinio, quos statim in secunda assertione referemus. Et probatur ratione, primo quia nulla ratio repugnantiae assignari potest, ut patebit facile solvendo rationes contrariae sententiae, suadentes talem speciem esse impossibilem, nihil tamen probant, ut in fine videbimus. Secundo id declarat D. Thomas a priori, quia istæ species im-

mediate infusæ a Deo, de his enim tantum loquimur, sunt quædam participationes exemplarum, seu idearum divinarum, sed idea simplicissima Dei representat res plures, cur ergo ab illa non poterit prodire aliqua illius participatio, quæ in plurimum rerum repræsentatione illam imitetur, licet neque in modo, neque in multitudine, et varietate illam possit exæquare? Certe nulla potest reddi ratio, quia ad repræsentandum plura modo limitato, non est, cur sit necessaria perfectio simpliciter infinita: qua necessitate seclusa, in aliis fiet facile æquiparatio. Et ita valida sit illatio a forma increata ad creatam, non quia haec sit aequalis illi, sed quia potest illam imitari in eo, quod infinitam perfectionem non requirit. Quia ad perfectionem ideæ increatae pertinet, ut possit sese communicare per quamdam eminentem participationem, quæ infinitatem simpliciter non includat.

4. *Richardi responsio ad proximam rationem refellitur.* — Quod autem Richardus et alii respondent, etiam dari singulas ideas singularum rerum, vel naturarum, et in Deo esse posse infinitas ideas, in Angelo autem non posse esse infinitas species, frivolum est, quia ideæ non multiplicantur in Deo secundum rem, sed secundum rationem: nos autem loquimur de idea, quatenus in re ipsa est res simplicissima et repræsentet plura: et inde concludimus, non repugnare hoc formæ creatæ in suo gradu. Sicut autem illa forma divina per habitudinem ad plures res distinguitur a nobis in plures ideas ratione distinctas, ita potest species repræsentans res plures, licet in re una sit, ratione distingui in plures per habitudinem ad res repræsentatas. Hic autem de unitate reali agimus, non rationis. Tertio id declaratur ex eodem D. Thoma quia species est proximum intelligendi principium efficiens, sed duæ virtutes activæ diversorum effectuum, et ordinis inferioris possunt uniri in una virtute superiori, ut D. Thomas supra ponit exemplum in humana prudentia comparata ad particulares quasi prudentias animalium et 2. cont. Gent., cap. 98, id declarat per virtutes eminentiores causarum universalium: *Nam species hæc (inquit) est universalis virtute ad modum formæ agentis in causa universalis, quæ quanto fuerit universalior, eo ad plura se extendet, et efficacius producit.* Sicut ergo in aliis virtutibus creatis hoc non repugnat, non est, cur in speciebus intelligibilius impossibile cogitetur.

5. *Secunda conclusio probatur auctor.* —

6. *Ad contrarium fundamentum in n. 2.* — *Ad secundum argumentum.* — Ad primum ergo negatur fundamentum ejus, scilicet, Angelum

a rebus singularibus earum species accipere, di plura, necessarium putat, ut primo, ac per loquendo de rebus naturalibus, ut jam a nobis ostensum est. Et ita ex hac parte non repugnat, Angeli species esse universales: imo inde ostenditur, id esse commodius, ne oporteat Angelum simul habere tot species distinctas, quot successive erunt individua substantiarum, et corporum a principio mundi usque ad finem. Quia vero aliquorum actuum interiorum Angeli acquirunt species, ut credimus, ideo postea in particulari dicemus, quid de universalitate talium specierum sentiendum sit. Secundum argumentum speciem aliquam difficultatis haberet, si species intentionalis esset formalis similitudo rei; quam representat: non est autem ita, sed est tantum eminentis principium, seu virtualis similitudo, quatenus vim habet effectricem cognitionis, per quam res, prout in se est, concipiuntur, et ideo nihil repugnat, ut species in se indivisibilis habeat superiorem, et universalem perfectiōnem, per quam possit expressam representationem plurium rerum etiam inter se dissimilium efficere. Imo etiam potest efficiere unum simplicem actum sibi adaequatum, qui omnes res illas intentionaliter, expresse, ac distincte representet, quia res, quae in se sunt distinctae, et dissimiles, vel etiam oppositae in verbo mentis eas representante, nullam oppositionem habent, vel repugnantiam, quia ibi altiori modo continentur sicut in divinis ideis varia, et opposita representantur sine oppositione, quam inter se habeant, prout in Deo sunt, hunc enim modum representationis species universales imitantur.

7. *Ad tertium.* — *Tribus modis adaequatum objectum unius speciei dici potest unum.* — *De primo modo sententia Scotti rejicitur.* — Ad tertium de adaequatione objecti respondeo, posse unam speciem, etiamsi plura representent, unum objectum adaequatum habere. Tribus autem modis potest concepi tale adaequatum objectum. Primo quod sit unum unitate reali in rerum natura existente. Secundo ut sit unum per formalem convenientiam omnium representabilium per talem speciem in aliqua differentia, vel praedicato, seu gradu communis in genere entis, ut est unum genus, vel una species. Tertio per solam convenientiam in aliqua conditione, sub qua representabiles sunt, vel cognoscibiles per eumdem actum res omnes, quae per unam speciem representantur. Primum modum videtur postulare Scottus in objecto cuiuscumque speciei intelligibilis, quia ut una species sit principium cognoscen-

di plura, necessarium putat, ut primo, ac per se, et adaequate unam rem representet, quae in se singularis sit, et virtute illa omnia continet, quae per talem speciem cognosci possunt. Et solum adhibet exemplum in essentia divina. Sed in hoc sensu negamus, talem unitatem objecti esse necessariam, quia neque ad unitatem potentiae, vel habitus est necessaria talis unitas in objecto, et ubi invenitur illa unitas objecti, ut in essentia divina, non est unitas principii, quod per modum speciei intelligibilis sit principium cognoscendi plura, sed est unitas objecti primaria, in quo tantum in causa cetera cognoscuntur, quia creaturae non cognoscuntur per divinitatem immediate, tanquam per medium incognitum, sed immediate cognoscitur ipsa ut objectum, et per illud tanquam per medium cognitum cetera cognoscuntur. Sicut etiamsi Angelus per speciem Solis potest plures proprietates, vel effectus Solis cognoscere, illa species si tantum representat solem immediate, non est universalis in ratione speciei, etiamsi mediate ad plurium rerum cognitionem conferre possit.

8. *Circa secundum modum sententia Cajetani et Ferrarensis.* — Secundum modum unitatis objecti adaequati videntur requirere ad unitatem speciei intelligibilis Cajetanus, dicto art. 3, § *Ad objectionem autem contra conclusionem*, et Ferrarensis 2, contra Gentes, cap. 98, post 3 concl., § *Ad hujus evidentiam*, ubi licet indefinite tantum dicere videatur, posse, seu non repugnare, hoc objectum adaequatum constari ex pluribus rebus, seu quidditatibus contentis sub aliquo uno communione quod sit primum et adaequatum objectum speciei, nihilominus videtur sentire speciem plura representantem, non posse aliter esse unam, nisi aliquod commune illis pro objecto adaequato habeat. Infra vero § *Ad evidentiam eorum*, licet hunc modum defendat, alium statim tradendum etiam admittit.

9. *Improbatur primo.* — Mihi autem simpliciter dicendum videtur, hunc modum unitatis objecti ad unitatem speciei intelligibilis necessarium non esse, quod notavit Capreolus, dicto art. 3, ad 1, Scotti contra 7 conclus. Et probatur primo, quia species angelicæ, ut dictum est, non representant per se primo naturam communem, sed individua: communis autem naturas solum quatenus in ipsis singularibus inveniuntur, seu quatenus ipsa individua prout inter se magis, vel minus similis sunt, representant, ergo non respiciunt communem naturam ut adaequatum objectum,

sicut habitus per se primo adaequatum objectum respicit.

Improbatur secundo. — Secundo quia alias species representans plura individua unius speciei, ipsam specificam naturam haberet pro objecto adaequato, et similiter species representans plures quidditates specificas, genus earum ut objectum adaequatum respiceret. Consequens vel per se falsum est, vel saltem non est necessarium, quia alias species representans plura individua, necessario representaret omnia possibilia sub eadem specie, quia respiceret naturam specificam pro adaequato objecto, et consequenter omnia in illius potentia contenta, quia hoc est de ratione objecti adaequati: et simili modo species plurium naturarum sub uno genere, necessario esset species omnium essentiarum specificarum sub illo genere multiplicabilium, quia respiceret genus ut adaequatum objectum. Consequens autem est falsum, ut in superioribus saepe dictum est, quia alias species hujusmodi necessario representarent infinita individua, vel quidditates sub eadem specie, vel sub eodem genere multiplicabiles et species universales representantes omnia singularia aliquando futura necessario representarent omnia sub illis speciebus, vel generibus possibilia, quod supra improbatum est.

10. *Improbatur tertio.* — Tertio quia nulla est ratio, ob quam necessarium sit, ut objectum adaequatum speciei intelligibilis universalis sit aliqua ratio communis, seu universalis: tum quia species non est universalis, quia naturam universalem representet, sed quia representat plures res: tum etiam quia in propriis habitibus, seu potentia non est semper id necessarium: nam visus, verbi gratia, objectum adaequatum habet, etiamsi fortasse non omnes qualitates visibles in uno genere communi convenient quod in sensu communi respectu omnium sensibilium certius est: et habitus fidei est unus, et tamen non est necesse, ut omnia credibilia in una communi ratione entis convenient, et in scientiis, verbi gratia, in philosophia sufficient, quod objecta in modo abstractionis convenient. Quamvis enim interdum ratio generica, vel alia communis praecise, et secundum se consideretur in scientia, nihilominus necesse non est, ut sit objectum adaequatum, quin potius esse potest partiale objectum, si secundum suam praecisam rationem formalem, et actualem spectetur, sicut est in Metaphysica ratio entis praecisa, vel in Physica ratio entis mobilis, ut est tantum to-

tum quoddam actuale, sic enim consideratur in quadam parte illius scientiae, et in aliis partibus considerantur differentiae, vel modi specialiores sub eadem abstractione, seu ratione scibili comprehendit. In speciebus autem intelligibilibus universalibus Angelorum, ut dixi, non datur habitudo per se ad naturam communem, ut communis est, et ideo illa, ut sic, nec ad objectum partiale, nec ad adaequatum objectum speciei, non debet ex aliqua convenientia generica, vel specifica rerum spectari.

11. *Tertius modus unitatis objecti explicatur et suadetur.* — Tertius ergo modus preferendus est: et dicendum, adaequatum objectum unius speciei universalis esse collectionem, seu multitudinem talium rerum singularium per talem speciem representabilium. Quae quidem representabilitas non est denominatio ab ipsa specie ut possibili, alias peteretur principium, et idem per idem explicaretur, nec designaretur unitas objecti, quae in suo genere esset prior, quam speciei unitas: est ergo aliqua convenientia, vel propinquitas inter tales res, vel in modo essendi, vel aliqua hujusmodi conditione, ratione cuius aptæ sunt magis inter se uniri in unius speciei representatione, quam cum aliis rebus. Ex qua convenientia non consurgit aliqua ratio communis representabilis per talem speciem, quae possit considerari ut objectum representatum et adaequatum, sed consurgit una ratio, ob quam per eamdem speciem representabiles sunt, quae ratio sub qua solet appellari. Et ita ratio generalis assertio- nis est, quia ad unitatem potentiae, vel habitus per se sufficit unitas ex parte objecti in aliqua ratione sub qua, licet in ratione, quae attingitur, non intercedat. Sicut lumen, et albedo, verbi gratia, licet forte in una ratione communi in genere entis sensibilis ut quod non convenient, ut in objecto adaequato visus comprehendatur, satis est, quod in modo multiplicandi species, seu immutandi potentiam convenient, tanquam in ratione sub qua, quae ad unitatem objecti visibilis adaequati constituerit sufficit. Idemque in sensu communi, et ejus objecto videre licet. Item in una scientia, quae potest plures species sub una ratione scibili contemplari, quamvis fortasse de communi genere non consideret. Item una qualitas altioris ordinis virtutem universalem habere solet ad plures qualitates inferiores faciendas, quas respicit suo modo tanquam adaequatum objectum, non propter convenientiam in genere, vel specie entis, sed propter aliquam aliam conditionem nobis sepe igno-